

# Pelajar perlu garis panduan guna bahasa kebangsaan

**Kuala Lumpur:** Kementerian Pendidikan mahu pelajar diberi panduan menggunakan bahasa kebangsaan dengan betul, sekali gus memudahkan proses pembelajaran bahasa dan menjadikan komunikasi lebih berkesan.

Menteri Pendidikan II, Datuk Seri Idris Jusoh, berkata amalan menggunakan bahasa kebangsaan dengan betul adalah penting dan perlu digalakkan dalam kalangan pelajar.

“Saya menyeru warga pendidik, Dewan Bahasa dan Pustaka (DBP) serta ibu bapa untuk memberi panduan kepada anak supaya menggunakan bahasa kebangsaan dengan betul.

*“Mereka juga wajar berasa bangga berkomunikasi menggunakan bahasa kebangsaan”*

**Idris Jusoh,**  
Menteri Pendidikan II

“Mereka juga wajar berasa bangga berkomunikasi menggunakan bahasa kebangsaan,” katanya kepada BH.

Beliau mengulas laporan akhbar sisipan BH, *Minda* semalam mengenai golongan muda kini semakin cende-

+rung, malah ramai berbangga menggunakan bahasa slanga dalam komunikasi harian bagi menonjolkan identiti kelompok sosial tersendiri.

Penggunaan bahasa slanga mencetuskan kebimbangan, terutama dalam kalangan pendidik, berikutan ada pelajar didapati terbawa-bawa dengan kebiasaan berbahasa slanga ketika menulis karangan peperiksaan.

## **Pengaruhi penulisan pelajar**

Munshi Dewan, Abdul Ghalib Yunus, dilaporkan sebagai berkata, aliran itu boleh mempengaruhi penulisan pelajar, malah beliau sendiri mendapati ada yang terbawa-bawa bahasa slanga ke dalam karangan peperiksaan sehingga gagal mengikut bentuk dan struktur bahasa atau ejaannya.

Sementara itu, Penasihat Kerajaan Dalam Hal Ehwal Sosial dan Kebudayaan, Tan Sri Dr Rais Yatim menyifatkan bahasa slanga sebagai 'perosak' kepada keindahan bahasa Melayu.

Katanya, bahasa ciptaan atau slanga yang menjadi aliran dalam kalangan pelajar dan remaja harus dibendung demi melindungi serta memelihara keindahan bahasa Melayu sebagai bahasa kebangsaan.

Beliau berkata, keindahan bahasa Melayu sepatutnya dibangga dan diagungkan sebagai warisan yang menggambarkan identiti serta keunikan bangsa, malah sudah dikaji secara mendalam dan berkembang pada peringkat antarabangsa.

"Sehubungan itu, penggunaan bahasa Melayu secara betul dan tepat amat penting serta perlu diterapkan dari peringkat awal di sekolah, selain diamalkan secara meluas dalam semua program dijalankan.

"Kementerian Pendidikan dan DBP perlu terus memimpin masyarakat, khususnya golongan muda yang terjebak dengan aliran penggunaan bahasa tidak tepat," katanya.